

Oqaluuserisassat pillugit nassuaat.
(Inatsisartut Siulittaasoqarfiat)

2012-imi Inatsisartut ukiakkut ataatsimiinnissaannut UKA 2012-mut oqaluuserisassatut siunnersuutit siunnersuutillu oqaluuserisassanngortinnejartut ulloq 24. august 2012 siullermik nassiunneqarput.

Oqaluuserisassat nassiunneqareerneranni Naalakkersuisut siunnersuutinik tunniussivissaq qaangiutereersoq immikkoortutut oqaluuserisassanik nalunaaruteqarput taakkunanngalu marluk oqaluuserisassanut ilangunneqarlutik:

- Imm. 101 – Naalagaaffiit Peqatigiit innarluutillit pisinnaatitaaffii pillugit isumaqatigiissutaata atuutilersinneqarnissaa pillugu Inatsisartut aalajangiiffigisassaattut siunnersuut aamma
- Imm. 102 - Naalakkersuisut utoqqarnut periusissiaq pillugu nassuaataat.

Naalakkersuisut Siulittaasuata kissaateqarnera tunngavigalugu marlunngorpat 25. september ataatsimiinnissap ullaakkut qulinut aallartinnissaa akueraa. Taamatut kissaateqarsimaneq Ilulissani nunat OLT-nut ilaasut ataatsimiinnissaannut peqataanissamik pissuteqarpoq. Tassunga atasumik Siulittaasoqarfip aalajangerpaa oqallinneq ullup qeqqanut unillatsiartoqarani ingerlaannassasoq.

Siunnersuutit arlallit siusinnerusukkut ataatsimiinnerni siullermeerneqareerput UKA 2012-imilu suliareqqinnejartussangortinnejarsimallutik. Siulittaasoqarfip inassutigaa siunnersuutit taakku toqqaannartumik taasissutigisassanngortinnejartassasut, Inatsisartuni oqallinnerup nangeqqinnejarnissaanut immikkut pissutissaqanngikkaangat.

Naalakkersuisut Inatsisartunulluunniit ilaasortat qinnuigineqarput siunnersuutip pineqartup suliarineqalinnginnerani Siulittaasoqarfimmut saaffiginissuteqartaqqullugit, siunnersuutip suliareqqinnejarnerani maani oqaluusereqqinnejarnissaa kissaatigineqarpat.

Ullut ataatsimiiffiusut ataasiakkaat ingerlaavartuussapput, taamaalillunilu immik-koortut ullumi ataatsimiiffiusumi oqaluuserineqarfissaminni angumerineqanngitsoortut ullormi ataatsimiiffiusumi tullermi oqaluuserineqartassallutik. Ullut ataatsimiiffiusut nal. 18:00 naammassereersimasarnissaat anguniarneqarpoq.

Inatsisartunut ilaasortat partiilluunniit oqaluuserisassanut oqaaseqaatissaqarunik kissaateqarunilluunniit oqaluuserisassat nassiunneqarnerannut atatillugu qinnuigineqarsimapput ataatsimiinnissaq kingusinnerpaamik sapaatip akunnerannik ataatsimik sioqquillugu Siulittaasoqarfimmut saaffiginnejquillugit. Siulittaasoqarfik oqaluuserisassat pillugit saaffiginissutinik uparuaatinilluunniit tigusaqanngilaq.

Naggataatigut oqaatigineqassaaq Inatsisartunut ilaasortat ataasiakkaat namminneq akisussaaffigimmassuk siunnersuutimik kalaallisut danskisullu eqqortumik oqaasertalerneqarsimanissaat. Siunnersuutini oqaasertaliussanik erseqqissaasoqarniarpat taakkununnga iluarsiissutit siunnersuutip UKA2012-mi oqaluuserineqarnissaa sioqquillugu Allattoqarfimmut nassiuteqquneqarput.

Oqaluuserisassat akuerineqartutut isigineqarput.